

神異典第一百九卷

僧寺部彙考三

河南通志 崇法寺

寺在開封府治東北齊天保六年始建名曰建國唐睿宗改爲相國寺明洪武初勅修置僧綱司成化二十年更賜今額嘉靖三十二年重修

祐國寺

寺在府治東北隅晉天福中僧紫薇課初建於明德坊名曰等覺禪院宋乾德間詔遷豐美坊卽今所慶曆中改上方寺內有鐵色琉璃塔俗呼爲鐵塔寺元末爲兵廢明洪武十六年僧視全重建天順間修葺嘉靖間重修

正覺寺

寺在禹州西義讓里宋時建明洪武六年修以文殊龍福崇因龍潭土城清涼六寺併焉

葆光寺

寺在彰德府湯陰縣西三十里唐天寶間建金大定間修明成化十六年重修相傳晉孫登學道之所有嘯臺及煉丹井白雲洞遺跡尙存

常樂寺

寺在武安縣南三十里鼓山之麓接齊書文宣帝自鄴都詣晉陽往來山下嘗起離宮于此以備巡幸復建此寺初名石窟天統間改智力宋嘉祐中復改今名金正隆三年重修

寶蓮寺

寺在安陽縣南三十里邑人余鍾英勅建鍾英明萬曆丁未科進士深心內典此寺遂爲南北叢林之冠

化城寺

寺在懷慶府濟源縣東北三十里有洞唐相裴休讀書之所咸通中建明永樂七年修

安國寺

寺在河南府治南唐咸通間建明洪武初修置僧綱司于內成化弘治間相繼修葺叅議喬縉爲記

少林寺

寺在登封縣西少室山北麓後魏孝文帝時建梁時達磨居此面壁九年隋文帝改名陟岵唐復名少林明洪武間重修

會善寺

寺在登封縣西後魏時建宋王著有記又有元雪庵李溥光所書茶榜刻字

御題寺

寺在靈寶縣治南初唐德宗爲雍王時征史朝義過之題詩于壁後卽位僧元覺詣長安請寺額詔以御題爲名金大定四年修明洪武十五年置僧會司于內成化六年重修

福勝寺

寺在鄧州治西南宋天聖間建明洪武十年修置僧正司于內寺東北隅有塔十三層高百餘丈中一井呼爲海眼因爲塔以鎮之

龍巢寺

寺在浙川縣東三十里魏太和間建因龍巢于此故名今窟尙存有碑

香巖寺

寺在浙川縣東南白崖山有兩禪院乃唐一行與虎茵二師所開一行在長安示寂肅宗歸而葬之鄧守表聞自葬後山中香風經月不息故名其寺曰香巖始建未詳明永樂間重修

陝西通志 慈恩寺

寺在西安府南曲江池唐高祖建中有鴈塔進士旣捷題名於此

金勝寺

寺卽崇仁寺在府城西郭外卽唐三藏法師譯經處古有玉佛殿尊經閣並轉輪藏

招福寺

寺乾封二年睿宗在藩立本隋正覺寺寺南北門額並睿宗所題長安二年上出等身金銅像一鋪並九部樂南北二門額上與岐薛二王親送至寺景龍二年詔寺中別建聖容院是睿宗在青宮真容也先天二年勅出內庫錢二十萬工匠一千人重修

光宅寺

儀鳳二年望氣者言光宅坊有興氣勅令掘得石函函內有佛舍利骨萬餘粒遂立光宅寺武太后始置七寶臺丞相韋處厚自居內庭至相位每歸輒至此寺焚香瞻禮

寶刹寺

隋開皇中立爲寺佛殿後造四面立柱當中構虛起兩層椽棟屈曲爲京城之奇妙故曰寶刹寺

臥龍寺

寺在陸海坊四牌樓南有吳道子畫觀音像及佛足跡碑初以像名觀音寺宋有僧惟果長臥其中人以臥龍呼之故名臥龍

章敬寺

寺在通化門外本魚朝恩宅後章敬皇后立寺故名殿宇四千一百三十間分四十八院以曲江亭百司館華清宮觀風樓及將相沒官宅捨給其用今廢

開福寺

寺在得辛坊有貝葉三片長三寸闊二寸細軟如綿帛蒼色真府中奇觀也瞻仰者甚衆

二龍寺

寺在咸寧永寧坊中有龍井宋咸淳國師曇延說法於此

資聖寺

寺本趙國公長孫無忌宅龍朔年爲文德皇后立爲尼寺咸亨四年改爲僧寺後被火焚灰燼中得經數部不損一字衆以爲異數日之間施捨鉅萬遂營造如故今改爲神峪寺在咸寧白鹿原下

羅漢寺

寺在五臺西石鼈谷四十里又上嶺二十里有羅漢洞遊人至此如在天上

廣教寺

寺在咸陽縣北三十里睦村地俗名三絕謂修塑畫也中有吳道子畫壁神彩飛動

大定寺

寺在鄠縣東南六十里昔魏武之始有李順卿者隱居此地誦金剛經聚疊瓦塔以記經數至隋大

業中乃以此地賜附馬尉遲安爲柴莊安嘗見一老人素服謂曰此古寺地何不再葺之安遂置寺掘地得順卿石像爲寺卽居賢寺

靈泉寺

寺在臨潼縣驪山下唐太宗幸溫泉改爲溫泉宮元宗每年幸之

崇皇寺

寺在高陵縣漢薄姬至此誕文帝唐初置宋太宗賜額

法相寺

寺在涇陽縣東北有宋游師雄題畫碑及金人題咏并前賢分襟橋詩周克新過師墓必下馬謁告師又有集賢書堂涇陽姑通判起穆進士世傑賽知縣賢三原劉主事德學馬光祿理及高陵馬生世傑吉生士皆講學於中

正果寺

寺在涇陽縣西北十五里係唐時古刹寺有佛藏全部在內

中興寺

寺在盤屋縣黑水谷仙遊潭上有馬融讀書石室

八龍院寺

寺在富平縣東三十里神光祖師說法八龍聽講處有塔半截斜立不崩俗名半截塔

金塔寺

寺在同州治東隋文帝建以葬其養母神尼者有司祝釐習儀之所也

安靖寺

寺在朝邑縣有鐘浮水而至叩之不鳴或曰宋熙寧間所鑄也

壽聖寺

寺在朝邑縣大慶關渡之西唐建一名雙泉寺明時某孝廉會試遇火感佛救益侈大之

精進寺

寺在澄城縣東門外唐肅宗時建有浮圖九級

普濟寺

寺在澄城縣金沙谷上有佛圖澄洗腸泉禱雨輒應

廻鑾寺

寺在澄城縣南景家河隋文帝避暑廻鑾於此

大佛寺

寺在邠州西三十里唐尉遲敬德建石岩萬仞卽鑿大佛像故名

大金佛寺

寺在鳳翔府治東元大德年勅修世祖鑄金佛像

法門寺

寺在扶風縣北二十里古塔四層唐憲宗迎佛骨於此明正德年僧澄段修

八角寺

寺在寶雞縣東一里有泉其形八角故名

開元寺

寺在隴州北二里內有木塔七級唐建

龍眼寺

寺在隴州東十五里山脊有二泉如龍眼故名唐鄂國公建

湧泉寺

寺在漢中府北七十里天臺山有湧泉故名

福嚴寺

寺在褒城縣西南九十里卽金華寺中有龍骨塔昔老僧嚴公於後洞得龍牙龍角龍骨數十夜夢一巨人縞衣告曰此山神龍所依因樵牧污穢龍已去矣今德人住此龍當復來今洞中之骨其蛻也嚴公卽建塔取龍骨盡瘞之

走平寺

寺在鳳縣東南一百里寺舊在山頂一旦山裂寺走平地亦奇事也故名走平

石櫃山寺

寺距平涼府華亭縣二十里唐趙聖僧有證道歌留壁

古塔寺

寺在華亭縣城內塔高數十仞

觀音寺

寺在華亭縣西二十五里有湫水甚靈民賴之

丈八寺

寺在崇信縣銅城佛高丈八巍然屹立

石宮寺

寺在崇信縣上三鄉東南鑿崖爲洞刻成石像如水簾洞

龍馬寺

寺在涇州東長武鎮宋太祖微時常過此僧守嚴者異其骨相陰使畫工圖于寺壁

妙華寺

寺在鞏昌府治北元至正年建有浮圖一十二層

三泉寺

寺在徽州東四十里石出三泉州之奇勝

普圓寺

寺在徽州西四十里有臥佛像有石岩石洞奇甚

瑞應寺

寺在秦州東八十里麥積山上隋時建有唐杜甫及五代時王仁裕詩

普觀寺

寺在甘州衛城南一百三十里祁連山下古名馬蹄寺開創無考有石門二石洞七層共三十餘處每洞廣狹不一俱有佛像明永樂十五年勅賜額曰普觀寺

聖容寺

寺在永昌衛城北二十里地名金川舊有石佛在石崖間

莊嚴寺

寺在涼州城南六十里紅崖地舊名淨覺禪寺明永樂五年三藏國師耳赤建勅改今名

塔寺

寺在涼州城北門內有石磚塔一十三級高一十一丈

弘覺寺

寺在西寧衛城東南隅舊名妙華菴明洪武二十三年建永樂十年勅賜額曰弘覺

髮塔寺

寺在山丹衛城東南隅初掘土得鐵佛五石函一內藏髮又有石鑪一刊曰髮塔寺

江南通志 靈谷寺

寺在江寧府鍾山東南舊於獨龍阜建道林寺梁改開善宋改太平興國後改蔣山明洪武初徙山之東偏改名靈谷自山門入松徑五里乃至寺其中路履之有聲鼓掌則聲若彈絲俗呼琵琶街殿

宇不施一木皆壘巖空洞而成後有浮圖卽梁寶誌改葬處塔前有石泉廻曲僧曇隱所得八功德水也石旁有古松偃榦明高帝月夜掛衣于上蟲蟻不生方丈扁以青林堂榜明高帝山居詩於上左有梅花塢寺有明高帝大靈谷寺記及徐一夔奉勅撰靈谷寺碑

棲霞寺

寺在府攝山南齊明僧紹故宅捨爲寺陳江總有碑隋造舍利塔於寺後唐改功德寺高宗製明隱君碑南唐改妙因寺徐鉉書額宋改普雲寺仁宗賜金寶方碑明洪武初仍名棲霞寺寺有王世貞記陳文燭重修棲霞寺碑陸光祖天王殿記汪道昆般若堂及多寶塔記序焦竑董其昌五百阿羅漢畫像記按攝山一名繖山中峯屹然卓立左右山環抱如拱陳江總及唐高宗碑尙完天王大雄法堂諸殿接於中峯之麓隋舍利塔前中峯澗水從石蓮孔中噴出爲品外泉倚山石佛千身爲千佛巖紗帽峯明月臺循中峯而上有白鹿泉珍珠泉疊浪巖再上爲天開巖爲明徵君故宅宅後有白乳泉僧寮倚山架壁各擅其勝白雲庵紫峯閣頗稱幽峻歷朝以來高僧棲息明覺浪禪師開法於此塔在焉笑峯竺庵山門重新今禪堂創建于中峯之下

鷄鳴寺

寺在府鷄籠山與覆舟臺城相接晉永康間始創道場明初爲普濟禪師廟洪武二十年改創鷄鳴寺遷靈谷寶誌公法函瘞於山麓建浮圖五級有施食臺寺中有憑虛閣望湖亭

清涼寺

寺在府石城門內崇山之阿寺極幽邃吳順義中爲興教寺南唐爲文益禪師道場號法眼宗最盛後主嘗留宿寺中宋太平興國間改清涼廣惠寺蘇軾嘗捨彌陀像于寺中明洪武初周王重建賜今額左上爲清涼臺俯視大江卽南唐翠微亭舊址

吉祥寺

寺在府清涼山之北元時爲天妃廟明永樂初改寺萬曆間焦茲讀書於寺建華嚴樓爲重修吉祥寺碑記後有古梅虬枝鐵幹扶疎十畝

弘濟寺

寺在府觀音門外燕子磯明洪武初卽山建觀音閣正德間因閣建寺賜名弘濟殿閣皆緣崖構成

以鐵繩穿石繫棟俯臨大江從江上望之如燕子飛

靜海寺

寺在府儀鳳門外盧龍山之麓明永樂間命使海外風波無警因建寺賜額有潮音閣傑出殿表

嘉善寺

寺在府鐵石山明正統中僧法通建寺賜額山椒有石佛閣蒼雲崖一線天奇石綺錯崖壑幽勝

崇化寺

寺在府高峯院明正統間重修賜額崖下有泉沸起水面若散花故名梅花水

大報恩寺

寺在府聚寶門外古長千里吳赤烏間康僧會致舍利吳大帝神其事置建初寺及阿育王塔江南塔寺之始也晉太康間劉薩阿得舍利於長千里復建長干寺晉簡文帝勅長干造三級塔梁武帝詔修宋改天禧寺建聖感塔元改天禧慈恩旌忠寺元末燬於兵明永樂十年勅建梵宇悉準宮闕造九級琉璃塔賜額大報恩寺御製碑記宣德再賜御製碑